

Gojgaeq Ndawbiengz Caw Hozbuj Dauq Moq

□ Dangz Yuzngingh cingjleix



Gizdieg ciengx duzbangxcaw.

Haujlai bi daeuj, doenghgiy gojgaeq riuzgangj aencaw miz baenz bak baenz cien, daih dem daih cienz roengzdaeu, aen beij aen ndei. Ndawde aengoj ceiq mizmingz youh cienzlah ceiq lai ceiq gyae haenx dwg aen gojgae ndawbiengz gvendaengz caw Hozbuj dauq moq.

Youq gwnzbiengz Cungguk, gaxgonq miz gienh saeh “caw Hozbuj dauq moq” dahraix. Ciuq bonj saw lizsij 《Sawgeiq Dunghhan · Goj Mung Cangz》 ndawde geiq, youq Ciuzdunghhan, Hozbuj Gin henz haij miz caw ok ndaw haij daeuj lai. Vunz bonjdieg cungj dwk lwgcaw gwn, aeu lwgcaw lawh haeuxgwn. Dwk lwgcaw souhaeuj lai dangqmaz, mizdi bouxhakguen couh gaemhdawz cungj saeh neix gag oet cienzngaenz haeuj daeh, gag cau h gak cungj gvidingh gvet bouxdwkcaw. Vihliux gvet ndaej engq lai, doengh ndaek hakguen yakrwx haenx mbouj guenj duzbangx seizlawz ok lwgcaw, cungj bik bouxdwkcaw bae lauz duzbangx. Yienghneix ne, miz ok lwgcaw noix lo, souhaeuj couh gemjnoix haujlai, gyoengqvunz dwkcaw couh mbouj miz cienz cawx haeuxgwn lo, neix dingzlai vunz deng daiiek.

Bouxvuengzdaeq Hansundi Liuz Bauj dang vuengzdaeq le, couh heuh Mung Cangz bae Hozbuj dang Daisouj. Mung Cangz daengz Hozbuj dangguen le, gig vaiq couh rox vihmaz vunz dwk bangx mbouj miz ngaiz gwn lo. Neix le de ok gvidingh gaij doenghgiy guhfap mbouj habngamj haenx, cawz doenghgiy gvidingh mbouj hab faplwd, caemhcaiq mbouj hawj doenghboux dwk bangx luenh roengz haij dwk duzbangx lai, yienghneix guh couh henho h ndei duzbangx hawj duzbangx miz lai. Yienghneix guh mbouj daengz bi ndeu, duzbangx youh miz haujlai lo, Hozbuj youh baenz ranghdieg ok lwgcaw lailai haenx.

Daj neix dauqlaeng, couh miz aen goj cwnzzyij heuhguh “caw Hozbuj dauq moq”, aen goj neix dwg lwnh vunzraez rox haenqrengz guh le, doeksat doenghyiengh ndei cungj dauq daengz ndaw fwngz bouxcawj roxnaeuz vunz youh dauq daengz gizdieg gaeuq.

Doenghgiy gojgaeq ndawbiengz

gvendaengz caw Hozbuj dauq moq miz lai aen, aen mbouj doengz aen, ndawde aen gojgaeq ceiq mizmingz haenx dwg: Youq ciuhgeq, vuengzdaeq baiq ndaek Daighen ndeu bae guenj singz Hozbuj, apbik bouxdwkbangx roengz haij bae aeu aen cawronghhaemh. Bonjdieg miz bouxdwkbangx ak haenx heuhguh Haijswng h deng heuh bae aeu lwgcaw. Haijswng h vihliux aeundaej cawronghhaemh gouq gyoengqvunz dwkcaw, mbouj lau dai bae daengz Vaengzrinhoengz dwk lwgcaw. Gizhaenx miz song duz sahyiz youh yak youh hung dawz aen cawronghhaemh. Haijswng h mbouj lau yungyieng, mbeihung dahraix, caeuq duz sahyiz hung yak doxhoenx, ndang deng sieng le lwed lae mbouj daengx, caeklaiq ndaej Dahgunghcujcaw cienz rengz gouq coengh, couh ndaej lix dauq. Dahgunghcuj vihliux gouq gyoengqvunz dwkcaw, sim ndei hawj aen cawronghhaemh hawj Haijswng h. Haijswng h ndaej cawronghhaemh le, dauq daengz gwnz mboek.

Ndaek Daighen rox le, angq yaek dai bae, aeu cawronghhaemh daeuj, gipmuengz dawz aen cawronghhaemh cang roengz ndaw habfaex bae, haemh haenx couh heuh gyoengq bing baujhoh aencawbauj neix bae gingsingz. Danhseih gyoengq bing de caengz ok ranghdieg Byameizlingj doxyawj haenx, sawqmwh gwnz haij miz benq ronghhau ndeu, liuxle aen cawronghhaemh ndaw habfaex haenx gaengq mbouj raen ngauez lo. Ndaek Daighen doeksaet baenz ngawz lo, gipmuengz dauq ndawsingz heuh bing bae apbik gyoengqvunz dwkcaw caiq roengz

ndaw haij bae ra cawronghhaemh. Neix Haijswng h youh deng roengz laj haij bae, ginggvaq haujlai hojnanz youq laj haij ra bae ra dauq, youq caiq raen Dahgunghcujcaw. Dahgunghcujcaw sim maij Haijswng h, mbouj nyienh hawj Haijswng h youq laj haij deng yungyieng, caiq hawj aen cawronghhaemh hawj Haijswng h. Haijswng h angq dangqmaz bae, bak naeuz gyo'mbaiq mbouj daengx. De got cawronghhaemh hwnj daengz gwnz mboek lo. Ndaek Daighen caiq ndaej cawronghhaemh le, gietdingh heuh bouxvunzhoiq de bag nohgumq le, soed cawronghhaemh haeuj ndaw noh bae. Caj giz sieng fukdauq ndei liux, caiq hwnj roen bae gingsingz. Mbouj ngeix daengz ranghdieg gyawj Byameizlingj, sawqmwh mbwn ndaem dei h laep, seiq henz byaj bag mbouj daengx, duzmax ndaek Daighen gwih haenx deng doeksaet le haenq buet mbouj daengx, ndaek Daighen deng doek roengz max le gyaeuj ngunh bae, cij raen miz diuz rongh hausaksak ndeu yap coh gwnz haij. Ndaek Daighen singj le heuh vunz bag giz sieng bouxhoiq de, mbouj raen aen cawronghhaemh nauq, ndaw singz vunz dwkcaw cungj deuz liux bae. Ndaek Daighen rox langh bae gingsingz couh deng vuengzdaeq dingh coih lo, coj deng gaj, cij simnae dangqmaz deng gag gyan ndaek gim dai bae.

Bi 2007 nienz, Doenghgiy gojgaeq ndawbiengz gvendaengz caw Hozbuj dauq moq ginggvaq Gvangjsih Bouxcuengh Swcigih Yinzmiz Cwngfuj doengzeiq, ndaej liedhaeuj daih'it buek swcigih gaep feihvuzciz vwnzva yizcanj mingzloeg.



▲ Boux ciengx bangxcaw caz-yawj naedcaw ndaw dungx duzbangxcaw.



▲ Caw Hozbuj ndei yawj dangqmaz.



▲ Caw Hozbuj guh baenz soij le vunz lai maij dangqmaz.



▲ Vunzhek cingq genj cawx caw Hozbuj.



▲ Goj caw Hozbuj dauq moq ndaej bien baenz saw lenzvanzva.



▲ Boux ciengx bangxcaw aeu naedcaw.